

光緒辛巳續修譜序

昔晉摯虞宋何承天唐姚士廉輩于天下姓氏且為窮源竟委撰譜志記纂等書況家譜所以奠繫世辨昭穆紀生卒志塋墓其所系尤重哉我族肇始西平二十六世祖子選公同兄重九公由江右遷湘四世至式祖公分為兩房祖公支下又析而為四我縣房祖是為明公乾隆六十年族先輩欲合而譜之以丁繁而志不一事寢迨道光庚子乃于我明房彙為支譜甲曾共董其務迄今已四十年矣當日同事大半謝世甲亦日就衰頹而族中之生者沒者不知凡几古以三十年為一世故譜亦准之茲則又踰十載過此以往將年愈遠丁愈增居愈散纂修亦愈難乃商之族中復為蒐輯成帙譬之作室往者既底法矣茲其肯堂肯構乎是舉也雖所錄仍止我房而統之以所自出使有所同而遠近一別之以所自分使有所異而尊卑明庶几仁立者義以行義至者仁以盡而于先王篤本之意尚不失欵

嗣孫法甲謹識